

ասացին՝ գեկեղեցիսն տուեալ են. և յետոյ լուաք, թէ զայլ եկեղեցիսն տը-
ւեալ են, բայց զաւագ եկեղեցին ոչ են տուեալ. և վասն այնորիկ մարդ են
առաքեալ առ Պապն: Եւ մինչ յայսմ տարակուսի էաք՝ որպէս արդեօք ե-
ղեալ իցէ, լուաք զգալուտ ղեսպանին, և մնացաք զալստեան նորա. և յոր-
ժամ եկն՝ նա եւս զայն ասաց, թէ զայլ եկեղեցիսն տուեալ են, բայց զաւագ
եկեղեցին ոչ են տուեալ, և վասն այնր մարդ է գնացեալ առ Պապն: Նա և
ոչ սակաւ յուսադրութիւն ետ մեզ, ասելով, եթէ յորժամ հասանիցեմ առ
Թագաւորն՝ դիւրին է այդ. և մեք այնմ ղեսպանին՝ որ Պարսից արքայէն
առ ձեր արքայն առաքիւր, թուղթ տուաք. մի՛ առ Թագաւորն, և միւս առ
ձեզ. զի քրիստոնէից զաւակ է և հաւատարիմ քրիստոնէից, որոյ անուն Մու-
սաբէկ յորջորջի: Բայց զայս գիտաւջիք, սիրելիք. զի ղեսպանին այսպէս եմք
սպասարեալ, թէ յորժամ գայցէ այդր, յինքենէ թուղթ առաքեսցէ յառա-
ջագոյն առ ձեզ. զի դուք եկեալ առջիք ի նմանէ գնամակն ձեր՝ որ ի մէնջ
է տուեալ. զի այսորիկ թղթոյս գիտաւորութիւն ունի այն թուղթն. թէպէտ
սակաւուք զանագանին ըստ բառին շարադրութեան: Եւ դուք պատրաստ
կացլիք, որ զկնի առնլոյ զձեր նամակն՝ ընդ ղեսպանին ի միասին մատուցա-
նիցէք զթուղթ Թագաւորին առ Թագաւորն: Եւ դարձեալ, յորժամ զաւեր
տեղւոյս լսէք, մի՛ այժմ եւս այնպէս կարծէք, այլ ողորմութեամբ Տեառն և
աղօթիւք ձեր՝ քան զառաջինն եւս պայծառագոյն է բիւրապատիկ, և է լլւ-
ցեալ պաշտօնէիւք Քրիստոսի, որք զցայգ և զցերեկ հանապազամատոյց աղօ-
թիւք և հաշտարար պատրագօք՝ զձեզ ունին ի մօի, և յաղագս ձերոյ կար-
ծրագոյն վշտացն՝ աղաղակեն առ Բարձրեալն: Որ և կողկողազին պաղատա-
նօք խնդրեմք յամենազօր Տեառնէն՝ հանդերձ վերոյ գրեցելովքս, բարեխօս
ունելով զյղքնաչարչար նահատակն Քրիստոսի զՍուրբն Գրիգորիոս. զի ա-
մենակարող զօրութեամբն և ամէնառատ զթութեամբն՝ ազատեսցէ զձեզ յայսմ
դառնագոյն վշտաց. և փոխանակ այդմ նեղութեան՝ մխիթարեսցէ զձեզ Հոգ-
ւոյն Սրբով, աստ և ի հանդերձեալն. և ինքն աւրհնեալ եղիցի յաւիտեանս
յաւիտենից. ամէն:

ԵՍ ՓԻԼԻՊՈՍ ԿԱԹՈՂԻԿՈՍ ԻՄՈՎ ԶԵՌՄՍ¹ ԳՐԵՑԻ:

1. Այսպէս է ի բնագրին: